

# Iniziativa cunter la chareschia

## Consuments, producents e gastronomia schan pervi dals pretschs stravagads

■ (sda/anr) Ina lada allianza politica batta encunter ils auts pretschs en Svizra. L'iniziativa per pretschs fairs vul impedir en l'avegnir ch'ins saja per il medem product en Svizra bler dapli ch'en l'exteriur. Ier han ins lantschà l'iniziativa. «La Svizra è gia daditg in'ins-la chareschia: Per products identics stuain nus pajar en noss pajais savens bler dapli che cumpraders en noss pajais vischins», di *Prisca Birrer-Heimo*, presidenta da la fundaziun per la protecziun da consuments, a chaschun da la conferenza da medias.

Ils pli auts pretschs pon ins declarar mo per part cun custs pli auts per pajas e per l'infrastructura en Svizra. I saja anzi concerns internaziunals che chatschian ad aut ils pretschs a moda artificiala per profitar da l'auta capaciad da cumpra.

Uschia fetschian ins pajar per vestgadura identica da concerns da moda internaziunals en Svizra fin 40 pertschient dapli ch'en Germania. Tar cosmetica cumportia la differenza fin 70 pertschient.

En in martgà rivalisand sajan las interpresas svizras avisadas ch'ellas n'hajan na-

gins dischavantatgs sch'ellas cumpran materialias e cumponentas importadas, di *Oliver Müller*, directur da swissmechanic.

Augments da pretschs da passa 50 pertschient na sajan dentant nagina raritad. Damai ch'ins vegnia sfurzà da cumprar sur ils chanals ch'ils furniturs prescrivan, hajan las interpresas svizras anc dapli dischavantatgs envers la concorrenza.

L'iniziativa populara oblihescha la confederaziun da far pli severa la lescha da cartel. En l'avegnir duai quai dar in scumond dad abus e las interpresas duain esser suttapostas a controllas. Il sforz fatic da stuaire cumprar rauba e servetschs memia chars duai vegnir abolì. Uschia vegniss impedì che interpresas pussantas pon evitar furniziuns pli favuraivlas e chatschar atras pretschs discriminants.

Firmas che falleschan duain ins pudair accusar tant en Svizra sco en l'exteriur. Plinavant duai l'artitgel constituziunal procurar ch'ils Svizzers e las Svizras na vegnian betg pli discriminads tar cumpras online. Betg pertutgads da l'iniziativa èn products agriculs che crodan sut il reschim agricul.